



Na osnovu člana 15. Zakona o Upravi za indirektno oporezivanje ("Službeni glasnik BiH", broj 89/05) i člana 61. stav 2. Zakona o upravi ("Službeni glasnik BiH", broj 32/02), direktor Uprave za indirektno oporezivanje d o n o s i

U P U T S T V O

O CARINSKOM POSTUPKU U PUTNIČKOM PROMETU

GLAVA I - OPĆI DIO

Član 1. (Predmet)

Ovim uputstvom bliže se propisuje način prijavljivanja i provedbe carinskog nadzora i postupka nad robom koju putnici nose sa sobom pri ulasku u ili izlasku iz carinskog područja Bosne i Hercegovine (u daljnjem tekstu: BiH), kontrola unošenja i iznošenja efektivnog stranog novca, vrijednosnih papira i vrijednosnica koje glase na strana sredstva plaćanja i druga pitanja vezana za carinski postupak u putničkom prometu s inostranstvom.

Član 2. (Pravni osnov)

Carinski postupak u putničkom prometu s inostranstvom reguliran je:

- a) odredbama člana 38. i 58. Zakona o carinskoj politici Bosne i Hercegovine ("Službeni glasnik BiH", broj 57/04 i 51/06), (u daljnjem tekstu: Zakon) i člana 1. i 2. Priloga Zakona,
- b) odredbama člana 100. do 105., 132. do 144. i 350. do 361. Odluke o provedbenim propisima Zakona o carinskoj politici Bosne i Hercegovine ("Službeni glasnik BiH", broj 63a/04 i 60/06), (u daljnjem tekstu: Odluka),
- c) Odlukom o slučajevima kada se ne naplaćuje iznos od 1% carinske vrijednosti za carinsko evidentiranje ("Službeni glasnik BiH", broj 31/05),
- d) odredbama člana 6. Zakona o Carinskoj tarifi BiH ("Službeni glasnik BiH", broj 1/98, 5/98, 7/98, 22/98, 31/02, 32/04 i 48/05),
- e) Odlukom o određivanju iznosa vrijednosti roba na koje se primjenjuje jedinstvena carinska stopa ("Službeni glasnik BiH", broj 6/98),
- f) odredbom člana 1. Zakona o vanjskotrgovinskoj politici Bosne i Hercegovine ("Službeni glasnik BiH", broj 7/98 i 35/04),
- g) Uputstvom o načinu i postupku reguliranja privremenog uvoza, privremenog izvoza i tranzita sportskog i lovačkog oružja i municije ("Službeni glasnik BiH", broj 56/05),
- h) Uputstvom o izdavanju dozvola za uvoz i izvoz umjetničkih djela i antikviteta ("Službeni glasnik BiH", broj 41/02),
- i) Zakonom o deviznom poslovanju ("Službene novine FBiH", broj 35/98) i Zakonom o deviznom poslovanju ("Službeni glasnik RS", broj 96/03),

- j) Pravilnikom o uslovima i postupku iznošenja efektivnog stranog novca, vrijednosnih papira i vrijednosnica koje glase na strana sredstva plaćanja ("Službene novine FBiH" broj 35/00),
- k) Uredbom o iznošenju i unošenju efektivnog stranog novca, konvertibilnih maraka, čekova i hartija od vrijednosti ("Službeni glasnik RS", broj 16/05),
- l) Zakonom o sprječavanju pranja novca ("Službeni glasnik BiH", broj 29/04).

Član 3. (Definicije)

(1) U primjeni ovog uputstva, pojmovi imaju slijedeće značenje:

- a) "putnik" znači:
 - 1) u dolasku/ulasku - svako lice koje privremeno ulazi u carinsko područje BiH i koje u njemu nema mjesto prebivališta i svako lice koje se nakon privremenog boravka u inostranstvu vraća u carinsko područje BiH u kojem ima prebivalište,
 - 2) u izlasku/odlasku - svako lice koje privremeno napušta carinsko područje BiH u kojem ima prebivalište i svako lice koje nakon privremenog boravka u BiH napušta to područje u kojem nema mjesto prebivališta.
- b) "predmeti domaćinstva" - znače lične predmete, kućnu posteljinu, namještaj i opremu namijenjenu za ličnu upotrebu ili zadovoljenje potreba domaćinstva pod uslovima da nemaju komercijalni karakter,
- c) "roba nekomercijalnog karaktera" - znači povremene uvoze robe isključivo za ličnu upotrebu putnika, njegove porodice ili za poklone, čiji karakter i količina upućuju da se ne radi o uvozu u komercijalne svrhe,
- d) "lični prtljag" - znači sav prtljag nekomercijalnog karaktera kojeg je putnik u stanju pokazati carinskim organima prilikom ulaska/izlaska u/iz carinskog područja BiH ili ga je predao na prijevoz prijevozničkoj kopaniji (tzv. prateći prtljag), ukoliko nesumnjivo može dokazati da ga je predao prijevozniku radi prijevoza u/iz BiH.

(2) Kao dokaz da je lični prtljag predat na prijevoz prijevozničkoj kompaniji radi prijevoza u/iz carinskog područja BiH može biti prijevozna karta putnika, prijevozna isprava i drugo.

Član 4. (Opće pravo)

Prema odredbama člana 1. Zakona o vanjskotrgovinskoj politici Bosne i Hercegovine protok roba je slobodan, s tim što se ne isključuju zabrane ili ograničenja prometa roba koje ugrožavaju javnu politiku, javni moral, javnu sigurnost, zdravlje ljudi, životinja i biljaka, zatim nacionalno bogatstvo od umjetničke, historijske ili arheološke vrijednosti, te industrijsko-komercijalnu svojinu ili eliminiranje opojnih droga i otpadnih materija.

GLAVA II - NAČIN PRIJAVLJIVANJA ROBE PRI DOLASKU PUTNIKA

Član 5. (Način prijavljivanja)

Robu koju putnik u dolasku unosi u carinsko područje BiH može prijaviti carinskim organima:

- a) usmeno,
- b) na drugi način i
- c) pismeno, podnošenjem carinske prijave u pisanom obliku na obrascu JCI-a ili korištenjem tehnike obrade podataka, s hodno članu 59. i 74. Odluke (u daljnjem tekstu: carinska prijava).

Član 6.

(Prijavljivanje usmenim putem)

(1) Usmenim putem može se prijaviti:

- a) roba nekomercijalnog karaktera sadržana u ličnom prtljagu putnika ili poslana iz inostranstva (član 132. Odluke),
- b) privremeno uvezena prijevozna sredstva za privatnu upotrebu (član 136. stav 1. tačka b) Odluke) i
- c) privremeno uvezene lične stvari i roba za sportske svrhe putnika (član 136. stav 1. tačka b) Odluke).

(2) Pri prelasku carinske linije (granice) u dolasku putnik je dužan usmeno prijaviti, a na zahtjev carinskog organa i pokazati svu robu koju nosi sa sobom, neovisno ima li mjesta provedbi carinskog postupka ili ne (tj. naplati uvoznih dažbina i drugih indirektnih poreza pri uvozu). U slučaju pronalaska neprijavljene robe istom je učinjen carinski prekršaj.

(3) Carinski organ, prema procjeni rizika, odlučuje da li će robu prijavljenu usmeno pregledati ili će prihvatiti usmenu prijavu putnika bez pregleda robe.

(4) Stvari koje nosi diplomatski kurir na osnovu diplomatskog kurirskog pisma ne podliježu carinskom pregledu.

(5) Carinski organ može da ne prihvati usmenu prijavu za robu koju za račun putnika unosi drugo lice u svojstvu zastupnika (špeditera) (član 134. stav 1. Odluke).

(6) Usmeno se ne može prijaviti:

- a) roba za koju carinski organi ne mogu utvrditi da su prijavljeni podaci tačni ili potpuni (član. 134. stav 2. Odluke) i
- b) roba koja podliježe zabrani, ograničenju ili nekoj drugoj mjeri, npr. dozvola, certifikat, odobrenje i sl. (član 142. Odluke).

Član 7.

(Prijavljivanje na drugi način)

(1) Putnik u dolasku, u smislu člana 140. Odluke, može prijaviti na "drugi način":

- a) robu nekomercijalnog karaktera koja se nalazi u ličnom prtljagu putnika i koja ima pravo na oslobađanje od plaćanja uvoznih dažbina prema članu 2. Priloga Zakona (čl. 137. stav 1. pod a) Odluke),
- b) prijevozna sredstva privremeno uvezena za ličnu upotrebu (čl. 139. stav 1. tač. b) Odluke),
- c) prijevozna sredstva registrovana u BiH, a namijenjena ponovnom uvozu u BiH i
- d) lične stvari i robu koju uvozi za sportske svrhe u skladu s članom 360. Odluke (član 139. stav 1. tačka a) Odluke).

(2) Roba prijavljena na drugi način smatra se pokazanom carini, a prijava prihvaćena i puštanje odobreno u momentu kada se vrši radnja iz člana 140. Odluke.

(3) Otkrije li se da je radnja iz člana 140. Odluke izvršena, a uvezena roba ne ispunjava uslove za prijavljivanje na drugi način, smatra se da je roba nezakonito uvezena, odnosno unesena.

Član 8.
(Prijavljivanje pismenim putem)

Putnik je dužan carinskim organima podnijeti carinsku prijavu za stavljanje u slobodan promet (u daljnjem tekstu: carinjenje) sljedeće nekomercijalne robe:

- a) čija vrijednost prelazi 3.000 KM,
- b) za koju carinski organi nisu u mogućnosti utvrditi vrstu, vrijednost i porijeklo, ukoliko od porijekla zavisi visina plaćanja uvoznih dažbina i drugih indirektnih poreza,
- c) za koju je, radi identificiranja i utvrđivanja drugih podataka, potrebno vještačenje i
- d) koja je prijavljena usmeno, a za koju se putnik ne slaže sa nalazom carinskog službenika u pogledu utvrđene vrste, količine, porijekla, vrijednosti ili utvrđenog iznosa uvoznih dažbina i drugih indirektnih poreza.

GLAVA III - POSTUPAK CARINJENJA ROBE KOJU UNOSI PUTNIK

Član 9.
(Postupak carinjenja)

Roba koju putnik u dolasku unosi, može se cariniti:

- a) uz oslobađanje od plaćanja uvoznih dažbina, pod propisanim uslovima,
- b) uz plaćanje uvoznih dažbina:
 - 1) u skraćenom postupku,
 - 2) u redovnom postupku, podnošenjem carinske prijave.

Član 10.
(Postupak carinjenja robe uz
oslobađanje od plaćanja uvoznih dažbina)

(1) U smislu člana 176. stav 5. Zakona, u vezi sa članom 2. Priloga Zakona, oslobođena je od plaćanja uvoznih dažbina roba iz stava (2) ovog člana koja je sadržana u ličnom prtljagu putnika koji dolazi iz inostranstva (neovisno o državljanstvu putnika), ukoliko se ne nalazi na ograničenjima ili zabranama i pod uslovom da nema komercijalni karakter.

(2) Oslobođanje od plaćanja uvoznih dažbina iz stava (1) ovog člana primjenjuje se po putniku i po danu na:

- a) nekomercijalnu robu, uključujući poklone i suvenire koji se nalaze u ličnom prtljagu putnika, a čija carinska vrijednosti nije veća od 200 KM,
- b) 200 cigareta ili 100 cigarilosa ili 250 grama duhana,
- c) 2 litre stolnog vina,
- d) jedan litar alkohola ili žestokog pića preko 22% vol.; ili dva litra desertnog vina, pjenušca ili drugih pića,
- e) 60 cc/ml. parfema i
- f) 250 cc/ml. toaletne vode.

Putnici mlađi od 17 godina ne mogu uvoziti duhanske proizvode i alkoholna pića.

(3) Robu iz stava (2) ovog člana carinski službenik oslobađa od plaćanja uvoznih dažbina usmeno bez ispostavljanja carinskih dokumenata. Ta roba je, u smislu člana 26. tačka 2. Zakona o porezu na dodatu vrijednost, oslobođena i od plaćanja poreza na dodatu vrijednost.

(4) Kada se u ličnom prtljagu putnika nalazi roba iz stava (2) tačka a) ovog člana pojedinačne carinske vrijednosti veće od 200 KM, na istu se prilikom unosa u BiH moraju naplatiti uvozne dažbine i drugi indirektni porezi na njenu ukupnu carinsku vrijednost, jer podjela vrijednosti takve robe se ne može vršiti (npr. ako putnik nosi televizor u boji vrijednosti 500 KM, televizor se ne može ocariniti tako da se za dio vrijednost od 200 KM oslobodi od plaćanja uvoznih dažbina, a da se na dio vrijednosti od 300 KM obračunaju i naplate dažbine, nego će carinski organi predmetni televizor ocariniti na vrijednost 500 KM i na taj iznos obračunati i naplatiti uvozne dažbine i druge indirektno poreze). Isto tako ne može se zbrajati povlastica više putnika pri uvozu jednog predmeta, jer se povlastica odnosi na svakog putnika pojedinačno (npr. kada četvero putnika u motornom vozilu uvezu jedan predmet vrijednosti 800 KM, te zahtijevaju primjenu povlastice, ne može se odobriti povlastica, nego se uvozne dažbine i drugi indirektni porezi obračunavaju na cijelu carinsku vrijednost tog predmeta).

(5) Roba iz stava (2) tačka b) do f) ovog člana, kao predmeti ličnog prtljaga putnika, oslobađa se od plaćanja uvoznih dažbina, neovisno o njihovoj pojedinačnoj ili ukupnoj vrijednosti.

(6) Kada se roba iz stava (2) tačka a) ovog člana koja se nalazi u putničkom prtljagu, prevozi željeznicom bez pratnje putnika i prijavljuje carinskom organu bez ličnog prisustva putnika, tada se podnosi carinska prijava za registriranu prtljagu na obrascu iz Priloga 23 Odluke, prema uslovima i ograničenjima utvrđenim tim obrascem.

Član 11.

(Carinjenje robe u skraćenom postupku po jedinstvenoj carinskoj stopi)

(1) Putnik koji pri dolasku iz inostranstva unosi robu preko količine i vrijednosti za koju se može osloboditi od plaćanja uvoznih dažbina, a namijenjena je za njegovu ličnu upotrebu ili upotrebu njegovog domaćinstva i ukupna joj vrijednost ne prelazi 3.000 KM, prijavljuje usmeno i ista se carini u skraćenom carinskom postupku na ganičnom prijelazu. Pri tome, carinski službenik za oslobađanje od plaćanja uvoznih dažbina izdvaja robu koja podliježe plaćanju dažbina u većem iznosu, a za plaćanje dažbina opredjeljuje robu koja podliježe plaćanju dažbina u manjem iznosu (npr. u prtljagu putnika nalaze se tri predmeta različite vrijednosti, jedan predmet vrijednosti 190 KM, drugi 180 KM, treći 160 KM, od plaćanja uvoznih dažbina biće oslobođen predmet vrijednosti 190 KM).

(2) Roba iz stava (1) ovog člana, izuzev robe koja je oslobođena od plaćanja carine i robe za koju je u Carinskoj tarifi BiH predviđena nulta stopa carine, carini se po jedinstvenoj carinskoj stopi od 10%.

(3) Jedinstvena carinska stopa ne primjenjuje se ukoliko je putnik, prije primjene jedinstvene carinske stope, zahtijevao da se roba carini po carinskim stopama iz Carinske tarife BiH. Sva roba koja čini pošiljku tada podliježe plaćanju carine po stopama iz Carinske tarife BiH i ista se upućuje na provođenje redovnog postupka carinjenja u carinskoj ispostavi. Dakle, putnik ne može zahtijevati da mu se dio robe carini po jedinstvenoj carinskoj stopi, a dio po stopama iz Carinske tarife BiH.

(4) Za robu prijavljenu usmenim putem, a koja podliježe plaćanju uvoznih dažbina i drugih indirektnih poreza, carinski organi putniku izdaju potvrdu o naplati indirektnih poreza (čl. 135. Odluke), čiji je oblik i sadržaj propisan posebnim uputstvom.

(5) Podaci o robi u potvrdi iz stava (4) ovog člana moraju biti precizni i jasni u pogledu vrste, količine i vrijednosti robe, kako bi se roba mogla identifikovati i utvrditi da li je u pitanju nekomercijalna roba za ličnu upotrebu putnika ili njegovog domaćinstva ili je u pitanju komercijalna roba. Kod unošenja podataka o robi ne mogu se, u odgovarajuću rubriku potvrde, unositi zbirni nazivi za robu kao npr.: "razna roba", "predmeti domaćinstva", "tehnička roba", jer to onemogućava kontrolu pravilne primjene propisa, te obračuna i naplate uvoznih dažbina i drugih indirektnih poreza. Kada se radi o robi koja je predmet ograničenja i kontrola nadležnih organa (npr. oružje, uređaji za

komunikacije i veze i sl.) u potvrdu se unose svi podaci neophodni za identifikaciju te robe (trgovački naziv robe, tip, marka, fabrički broj, godina proizvodnje i drugi podaci karakteristični za takvu robu), kao i podaci o dokumentima koji prate robu.

(6) Način i postupak vođenja evidencije o naplaćenim uvoznim dažbinama i drugim indirektnim porezima po potvrdi iz stava (4) ovog člana propisan je posebnim uputstvom.

Član 12.

(Primjena preferencijalne stope kod carinjenje robe u skraćenom postupku)

(1) Prema važećim Ugovorima o slobodnoj trgovini koje je BiH zaključila sa drugim državama, radi pojednostavljenja postupka u putničkom prometu, propisana su određena izuzeća od podnošenja dokaza o porijeklu za proizvode što ih unose fizička lica kao dio lične prtljage, pod uslovom da su u pitanju proizvodi nekomercijalnog karaktera deklarirani kao proizvodi s porijeklom, bez sumnje u istinitost takve izjave i da njihova ukupna vrijednost ne prelazi 1.200 eura.

(2) Za robu iz stava (1) ovog člana carinjenje, odnosno obračun uvoznih dažbina i drugih indirektnih poreza može se obaviti na graničnom prelazu uz primjenu preferencijalne stope, pri čemu se u potvrdi o naplati indirektnih poreza mora upisati napomena da je primijenjeno preferencijalno porijeklo (npr. primjena preferencijalnog porijekla sa Republikom Makedonijom).

(3) Za robu vrijednosti veće od vrijednosti navedene u stavu (1) ovog člana, za primjenu preferencijalne stope potrebno je priložiti ili izjavu na fakturi (ako je vrijednost do 6.000 eura) ili uvjerenje o kretanju EUR 1. (kada je roba veće vrijednosti), s tim da tada treba provesti redovan carinski postupak. I u slučaju kada fizičko lice traži primjenu preferencijalne stope, a postoji sumnja u istinitost njegove izjave o porijeklu, neovisno o vrijednosti robe, carinjenje treba obaviti u redovnom carinskom postupku, u kojem postupku je neohodno podnijeti dokaz o porijeklu robe za primjenu preferencijalne stope.

Član 13.

(Carinjenje robe u redovnom postupku)

(1) Za robu iz člana 8. i člana 12. stav (3) ovog uputstva provodi se redovan postupak carinjenja u carinskoj ispostavi, uz podnošenje carinske prijave.

(2) Carinska prijava iz stava (1) ovog člana popunjava se u skladu sa propisima koji regulišu pitanje popunjavanja carinskih prijava.

Član 14.

(Postupak sa robom koja se izvozi/iznosi)

Postupak prijavljivanja robe koja se izvozi/iznosi u putničkom prometu pobliže je propisan posebnim uputstvom o izvozu.

GLAVA IV - PRIVREMENI UVOZ

Član 15.

(Privremeni uvoz)

(1) Strani putnik i državljanin BiH koji ima prebivalište u stranoj zemlji, a koji privremeno dolazi u BiH radi turizma, liječenja, posjete rodbini ili iz drugih razloga, može, uz oslobađanje od plaćanja uvoznih dažbina i drugih indirektnih poreza, privremeno uvesti:

- a) lične stvari i robu za sportske svrhe, u skladu sa članom 360. Odluke i

b) prijevozna sredstva za privatnu upotrebu, u skladu s čl. 355. do 358. Odluke.

(2) Da li se radi o putniku iz stava (1) ovog člana, carinski službenik, ukoliko je to potrebno, može utvrditi uvidom u putnu ispravu putnika ili drugi odgovarajući dokument.

Član 16.

(Privremeni uvoz ličnih stvari i robe za sportske svrhe)

(1) Ličnim stvarima (predmetima) putnika smatraju se svi novi ili korišteni predmeti koji su putniku potrebni tokom putovanja, uzimajući u obzir sve okolnosti putovanja (pol i zanimanje putnika, godišnje doba, trajanje i svrhu putovanja, vrijeme zadržavanja u zemlji, itd), isključujući robu koja se uvozi u komercijalne svrhe.

(2) U robu privremeno uvezenu za sportske svrhe spadaju: sportski rekviziti i ostali predmeti koje putnik koristi na sportskim takmičenjima, demonstracijama ili treninzima za vrijeme boravka u BiH. Ilustrativna lista ličnih stvari putnika i robe koja se privremeno uvozi za sportske svrhe navedena je u Prilogu 1. ovog uputstva.

(3) Lične stvari i robu koju privremeno uvozi za sportske svrhe, putnik prijavljuje carinskom organu na graničnom prelazu:

- a) usmeno, u skladu sa članom 58. stav 1. tačka c) Zakona i članom 136. stav 1. tačka (b) Odluke,
- b) radnjom iz člana 140. Odluke (na drugu način),
- c) pismeno, na zahtjev carinskih organa, podnošenjem carinske prijave ukoliko se radi o velikom iznosu uvoznih dažbina ili kada postoji ozbiljan rizik od nepridržavanja obaveza iz predmetnog postupka (član. 376. Odluke).

(4) U slučaju iz stava (3) tačka a) ovog člana, uz usmenu carinsku prijavu za privremeni uvoz, podnosi se Spisak stvari koje putnik privremeno unosi/iznosi iz člana 17. ovog uputstva (u daljnjem tekstu: Spisak stvari).

Član 17.

(Obrazac Spiska stvari)

(1) Obrazac, odnosno oblik i sadržaj Spiska stvari, u skladu sa članom 302. stav 2. Odluke, dat je u Prilogu 2. ovog uputstva. Obrazac Spiska stvari štampa se u blokovima od 50 listova (25 setova) formata A-4, s tim da su u svakom bloku dva uzastopna lista označena istim serijskim brojem i čini jedan set.

(2) Svi obrasci su pri vrhu cijelom širinom perforirani. Prvi primjerak Spiska stvari na poledini je karboniziran i odštampan je zelenom bojom, a drugi primjerak plavom bojom.

(3) Štampanje i dostavu carinskim organima obrasca Spiska stvari obezbjeđuje Sektor za poslovne usluge.

Član 18.

(Postupak prijavljivanja po Spisku stvari)

(1) Lične stvari i robu za sportske svrhe koju putnik privremeno uvozi/unosi dužan je upisati u Spisak stvari. Spisak stvari putnik popunjava i potpisuje u dva primjerka.

(2) U Spisak stvari putnik upisuje: prezime i ime, adresu, broj identifikacione isprave i mjesto/državu izdavanja (pasoš, lična karta itd.) i podatke o stvarima koje privremeno unosi. Podaci o

stvarima unose se pojedinačno za svaku stvar, uz navođenje svih karakterističnih podataka na osnovu kojih se iste mogu identifikovati prilikom ponovnog izvoza (vraćanja) u inostranstvo (vrsta, količina, naziv, marka, tip, tvornički ili drugi broj, godina proizvodnje, da li je nova ili rabljena i druge podatke karakteristične za takvu robu).

(3) Carinski službenik dužan je izvršiti pregled prijavljenih stvari, te njihovo stanje sravniti sa podacima iz podnijetog Spiska stvari. Ukoliko se, po Spisku stvari, prijavljeno stanje stvari slaže sa stvarnim, carinski službenik će u Spisak stvari unijet zabilješku "Sravnjeno, stanje uredno", te datum i vrijeme privremenog unosa, te oba primjerka ovjeriti svojim potpisom i službenim pečatom. Prvi primjerak Spiska stvari carinski službenik zadržava u službenoj evidenciji, a drugi primjerak predaje putniku. Primjerak Spiska stvari koji ostaje u carinskom uredu, odlaže se, u posebni registrator, po redosljedju izdavanja i čuva se tri godine od dana izdavanja.

Član 19.

(Postupak razduživanja privremenog uvoza ličnih stvari i robe za sportske svrhe ponovnim izvozom)

(1) Privremeno uvezene lične stvari i robu za sportske svrhe koje je putnik, usmeno ili radnjom iz članom 140. Odluke, prijavio ulaznom carinskom uredu u dolasku, prilikom njihovog ponovnog izvoza u inostranstvo prijavljuje izlaznom carinskom uredu na granici na isti način na koji ih je prijavio prilikom njihovog privremenog uvoza/unosa.

(2) Lične stvari i robu za sportske svrhe privremeno uvezene uz podnošenje Spiska stvari, putnik je prilikom ponovnog izvoza u inostranstvo dužan prijaviti izlaznom carinskom uredu na granici uz predočavanje robe i Spiska stvari. Lične stvari i roba za sportske svrhe koje putnik ponovno izvozi/iznosi, carinski službenik dužan je sravniti sa podacima iz Spiska stvari, te ukoliko utvrdi da se stanje stvari slaže sa podacima iz Spiska stvari, zadržaće Spisak stvari kojeg je predočio putnik, a putniku dozvoliti nastavak putovanja. Na zadržanom primjerku Spiska stvari carinski službenik je dužan unijeti zabilješku: "Sravnjeno, stanje uredno" te istu ovjeriti svojim potpisom i službenim pečatom, uz navođenje datuma i vremena pregleda stvari. Zadržani Spisak stvari carinski službenik je dužan priložiti uz njegov originalni primjerak iz člana 18. stav (3) ovog uputstva, čime je postupak privremenog uvoza razdužen.

(3) Ukoliko izlazni granični carinski ured preko kojeg su privremeno uvezene lične stvari i roba za sportske svrhe ponovno izvezeni u inostranstvo nije ujedno i carinski ured preko kojeg je ta roba privremeno uvezena, izlazni granični carinski ured će zadržati Spisak stvari, službenim putem, dostaviti carinskom uredu preko kojeg su lične stvari i predmeti za sportske svrhe privremeno uvezeni, a zadržati njegovu kopiju. Primljeni Spisak stvari priložit će uz originalni primjerak i time razdužiti postupak privremenog uvoza.

(4) Lične stvari i roba za sportske svrhe privremeno uvezeni uz podnošenje carinske prijave razdužuju se podnošenjem carinske prijave za ponovni izvoz.

Član 20.

(Postupak razduživanja privremenog uvoza ličnih stvari i robe za sportske svrhe carinjenjem)

(1) Ukoliko putnik, sve ili dio privremeno uvezenih ličnih stvari i robe za sportske svrhe želi ocariniti, treba se obratiti najbližoj carinskoj ispostavi, radi prijave za carinjenje. U ovom slučaju, uz ispunjenje propisanih uslova, roba se prijavljuje za carinjenje s pozivom (u polju 40 carinske prijave) na broj Spiska stvari ili na broj carinske prijave, u zavisnosti od načina na koji je roba prijavljena prilikom privremenog uvoza.

(2) Kada se lične stvari i roba za sportske svrhe privremeno uvezeni uz podnošenje Spiska stvari djelimično carine, carinski službenik će u Spisak stvari unijeti zabilješku: "Roba pod rednim brojem Spiska stvari ocarinjena po carinskoj prijavi (navesti vrstu prijave npr. IM 4) br. od godine", koju će potom ovjeriti svojim potpisom i službenim pečatom. Ovjereni Spisak stvari vratit će putniku radi razduženja privremenog uvoza kod izlaznog graničnog carinskog ureda, a njegovu kopiju zadržati uz carinsku prijavu.

Član 21.

(Privremeni uvoz vozila za privatnu upotrebu)

Postupak privremenog uvoza vozila za privatnu upotrebu namijenjenih ponovnom izvozu iz BiH biće regulirano posebnim uputstvom.

GLAVA V - PRIVREMENI UVOZ, PRIVREMENI IZVOZ I TRANZIT SPORTSKOG I LOVAČKOG ORUŽJA I MUNICIJE

Član 22.

(Privremeni uvoz, privremeni izvoz i tranzit
sportskog i lovačkog oružja i municije)

(1) Način i postupak privremenog uvoza, privremenog izvoza i tranzita sportskog i lovačkog oružja i municije radi učešća na organizovanim treninzima, takmičenjima i lovu, te šta se smatra lovačkim i sportskim oružjem, regulirano je Uputstvom o načinu i postupku reguliranja privremenog uvoza, privremenog izvoza i tranzita sportskog i lovačkog oružja i municije ("Službeni glasnik BiH", broj 56/05).

(2) Zahtjev za privremeni uvoz, privremeni izvoz i tranzit sportskog i lovačkog oružja i municije, u dva istovjetna primjerka, podnosi putnik graničnom carinskom uredu. Zahtjev treba da sadrži naročito slijedeće podatke:

- a) prezime /očevo ime/ i ime osobe koja rukuje oružjem,
- b) adresu na koju se oružje otprema ili transportuje,
- c) dokument o identifikaciji sportskog i lovačkog oružja i to:
 - 1) za sportsko oružje: Lista oružja, oprema za oružje i municiju (serijski broj oružja, proizvođač, kalibar municije, prateća oprema), ovjerena od nacionalnog strukovnog saveza,
 - 2) za lovačko oružje: Oružni list,
- d) sredstvo transporta,
- e) datum polaska i procijenjeni datum povratka,
- f) poziv organizatora na ime lica,
- g) granični prijelaz na koji će ući i izaći.

(3) Privremeni uvoz, privremeni izvoz i tranzit se može odobriti za najviše tri komada sportskog, odnosno lovačkog oružja po osobi, sa pripadajućom opremom za ta oružja i određenu količinu municije po jednom komadu oružja, zavisno od kalibra i to:

- a) za sportsko oružje:
 - 1) kugla 12 mm do 500 kom,
 - 2) patrone sa sačmom 12 mm do 500 kom,
 - 3) kugla 5,6 mm do 3.000 kom,
 - 4) dijabolo 4,5 mm do 5.000 kom,
- b) za lovačko oružje:

- 1) patrone 4-36 mm do 100 kom,
- 2) metak 6,5 - 8 mm do 20 kom.

(4) Sportsko i lovačko oružje i municija moraju biti u ličnom prtljagu putnika kojem je izdato odobrenje za privremeni uvoz, privremeni izvoz i tranzit.

(5) Organizator iz stava 2. tačka f) ovog člana treba da izda potvrdu o broju utrošenih zrna učesnika na učešću na koje su pozvani.

(6) Obrazac zahtjeva iz stava (2) ovog člana dat je u Prilogu 3. ovog uputstva i na isti se odgovarajuće (*mutatis mutandis*) primjenjuju odredbe člana 17. do 20. ovog uputstva.

Član 23.

(Postupak privremenog uvoza i ponovnog izvoza sportskog i lovačkog oružja i municije)

U slučaju privremenog uvoza sportskog i lovačkog oružja i municije, te njihovog ponovnog izvoza iz carinskog područja BiH, odgovarajuće se primjenjuju odredbe člana 18. do 20. ovog uputstva.

Član 24.

(Postupak privremenog izvoza i ponovnog uvoza sportskog i lovačkog oružja i municije)

U slučaju privremenog izvoza sportskog i lovačkog oružja i municije, te njihovog ponovnog uvoza u carinsko područje BiH, odgovarajuće se primjenjuju odredbe člana 18. i 19. ovog uputstva.

Član 25.

(Postupak tranzita sportskog i lovačkog oružja i municije)

U slučaju tranzita sportskog i lovačkog oružja i municije odgovarajuće se primjenjuju odredbe člana 18. i 19. ovog uputstva, s tim što je izlazni (odredišni) carinski ured po ovjeri zahtjeva za tranzit sportskog i lovačkog oružja i municije iz člana 22. ovog uputstva, dužan isti službenim putem dostaviti ulaznom carinskom uredu radi razduženja postupka tranzita, a zadržat će njegovu kopiju.

GLAVA VI - POSTUPAK IZVOZA U PUTNIČKOM PROMETU

Član 26.

(Pravo na izvoz)

Putnik u odlasku može izvesti/iznijeti:

- a) robu nekomercijalnog karaktera,
- b) privremeno, lične stvari i robu za sportske svrhe,
- c) privremeno, prijevozno sredstvo za privatnu upotrebu,
- d) privremeno uvezene lične stvari i sportsku opremu iz člana 5. tačka c) ovog uputstva člana i

- e) privremeno uvezena prevozna sredstva za privatnu upotrebu iz člana 5. tačka d) ovog uputstva.

Član 27.
(Prijavljivanje robe)

(1) Putnik u odlasku (izlasku) u inostranstvo dužan je pri prelasku carinske linije carinskom organu prijaviti, a na njihov zahtjev i pokazati sve stvari koje iznose. Carinski organ odlučuje da li će prijavljenu robu pregledati ili će prihvatiti usmenu prijavu putnika bez provjere.

(2) Robu nekomercijalnog karaktera putnik može prijaviti usmeno u skladu s članom 133. Odluke ili na drugi način radnjom iz člana 140. stav 1. tač. b) Odluke (član 138. stav 1. tačka a) Odluke).

(3) Način prijavljivanja robe za postupak izvoza pobliže je reguliran posebnim uputstvom o postupku izvoza.

Član 28.
(Privremeni izvoz ličnih stvari i predmeta za sportske svrhe)

(1) Putnik s prebivalištem u BiH koji privremeno odlazi u inostranstvo i privremeno iznosi lične stvari i predmete za sportske svrhe iz Priloga 1. ovog uputstva dužan ih je prijaviti carinskom organu usmeno, uz podnošenje Spiska stvari u dva primjerka na obrascu iz Priloga 2. ovog uputstva. U tom slučaju, na postupak privremenog izvoza odgovarajuće se primjenjuje član 18. ovog uputstva. Ako putnik u Spisak stvari upiše podatke o robi koju ne nosi sa sobom, čini carinski prekršaj.

(2) Prilikom povratka iz inostranstva, putnik koji ponovno uvozi (vraća) stvari koje je u skladu sa stavom (1) ovog člana privremeno iznio, obavezan ih je usmeno prijaviti ulaznom carinskom uredu podnošenjem primjerka Spiska stvari ovjerenog i vraćenog od izlaznog carinskog ureda pri privremenom izvozu istih. Tim Spiskom stvari putnik dokazuje da su u pitanju stvari koje je privremeno iznio, radi ostvarivanja prava na oslobađanje od plaćanja uvoznih dažbina kao na vraćenu robu. U postupku ponovnog uvoza privremeno izvezenih/iznijetih stvari odgovarajuće se primjenjuju član 19. ovog uputstva.

(3) Dođe li do gubitka Spiska stvari po kojem je roba privremeno izvezena ili ako putnik nije prilikom izlaska prijavio carinskim organima stvari koje je privremeno iznio, u ponovnom uvozu istih putnik može dokazivati da je stvari privremeno iznio u inostranstvo računom o kupovini, carinskom prijavom zemlje uvoznice ako postoji, garantnim listom ili na drugi način, pod uslovom da se roba može identifikovati, tj. utvrditi da je riječ o robi koja je bila privremeno izvezena. Putnik čini carinski prekršaj ako prilikom ulaska u carinsko područje BiH robu koju nosi sa sobom prijavi kao robu koju ponovno unosi, a ne može dokazati da se radi o robi koju je kao putnik privremeno iznio iz tog područja.

Član 29.
(Privremeni izvoz vozila)

Postupak privremenog izvoza vozila za privatnu upotrebu namijenjenih ponovnom uvozu u BiH biće regulirano posebnim uputstvom.

GLAVA VII - DEVIZNA KONTROLA I OSTALE ODREDBE O PUTNIČKOM PROMETU

Član 30.

(Unošenje i iznošenje efektivnog stranog novca, vrijednosnih papira i vrijednosnica)

(1) Kontrolu unošenja i iznošenja efektivnog stranog novca, vrijednosnih papira i vrijednosnica koje glase na strana sredstva plaćanja u putničkom prometu vrše carinski organi na graničnim prelazima u skladu s Pravilnikom o uslovima i postupku iznošenja efektivnog stranog novca, vrijednosnih papira i vrijednosnica koje glase na strana sredstva plaćanja ("Službene novine FBiH", broj 35/00) i Uredbom o iznošenju i unošenju efektivnog stranog novca, konvertibilnih maraka, čekova i hartija od vrijednosti ("Službeni glasnik RS", broj 16/05).

(2) O svakom prenosu stranog novca (kovanica ili valute BiH ili bilo koje druge zemlje, putnički čekovi, poštanske doznake i druga sredstva plaćanja gdje se titular mijenja po uručenju) i obveznica preko državne granice u vrijednosti 10.000 KM i više, carinski organi, u skladu sa članom 25. Zakona o sprječavanju pranja novca ("Službeni glasnik BiH", broj 29/04), dostavljaju podatke Finansijsko-obavještajnom odsjeku (FOO) Agencije za istrage i zaštitu BiH, a putem Odsjeka za poslovne usluge u Regionalnom centru, na način propisan posebnim aktom.

(3) Podaci iz stava (2) ovog člana treba da obuhvate:

- a) ime, prezime, datum rođenja i mjesto prebivališta, lica koje prenosi gotovinu i vrijedonosne papire preko državne granice,
- b) naziv i sjedište pravnog lica ili ime, prezime i prebivalište fizičkog lica za koje se obavlja prenos gotovine ili vrijedonosnih papira preko državne granice,
- c) podatak da li je prijenos bio prijavljen carinskim organima.

Član 31.

(Carinski postupak s prtljagom u avionskom i pomorskom saobraćaju)

Na kontrolu i carinski postupak u vezi sa prtljagom putnika u avionskom i pomorskom saobraćaju primjenjuju se odredbe člana 99. do 105. Odluke i odredbe ovog uputstva.

Član 32.

(Uvoz/izvoz umjetničkih djela i antikviteta)

Uvoz/unošenje i izvoz/iznošenje umjetničkih djela i antikviteta utvrđenih u Prilogu III koji je sastavni dio Odluke o klasifikaciji roba na režime izvoza i uvoza ("Službeni glasnik BiH", broj 22/98, 40/02) podliježe dozvoli Ministarstva vanjske trgovine i ekonomskih odnosa BiH u skladu sa Uputstvom o izdavanju dozvola za uvoz i izvoz umjetničkih djela i antikviteta ("Službeni glasnik BiH", broj 41/02).

GLAVA VIII - PRIJELAZNE I ZAVRŠNE ODREDBE**Član 33.**

(Prestanak važenja ranijih propisa)

Danom stupanja na snagu ovog uputstva prestaju da važe sva ranija akta kojima su bila regulirana pitanja koja su predmet ovog uputstva.

Član 34.

(Sastavni dio i stupanje na snagu)

(1) Sastavni dio ovog uputstva čine Prilog 1. - Ilustrativna lista ličnih stvari i robe za sportske svrhe, Prilog 2. - Spisak stvari koje putnik privremeno unosi/iznosi i Prilog 3. - Zahtjev za privremeni uvoz/privremeni izvoz/tranzit sportskog i lovačkog oružja i municije.

(2) Ovo uputstvo stupa na snagu osmog dana od dana objavljivanja u "Službenom glasniku Bosne i Hercegovine", a bit će objavljeno i na WEB stranici Uprave za indirektno oporezivanje BiH.

Broj: 01- 02-5024/06
Datum, 23.10-2006. godine

DIREKTOR
Kemal Čaušević